

Saturday, October 18, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

MNF PRESS CONFERENCE

MNF Legal Board Chairman Pu C. Lalramzauva’n ZPM sorkar hnuaiah ram leh hnam himna aiin sum hmuh theihna tur a pawimawh zawk tih a sawi.

Wawiina Aizawl Press Club-a tun thla ni 29 a Mizoram pum huapa Total Bandh huaihawt an tum chhan chanchinbumite hmaa a sawifiahnaah Pu C. Lalramzauva chuan he thu hi a sawi a. FCAA, 2023 chu Union Parliament in a pass hnuah hman theih turin Gazette of India-ah kum 2023 khan tih chhuah a nih thu a sawi a. Hemi chungchangah hian Mizoram sorkar, MNF sorkar chuan ram mipuite himna leh that tlanna tur a ni lo tih hriain, kum 2023 August Ni 21 khan Mizoram State Legislative Assembly-ah Official Resolution hmangin a lo hnawl tawh tih sawiin ZPM sorkar a lo din hnuah ngaihtuahna dang neiin, kumin August ni 27 khan Official Resolution dang a lo siam ve leh a ti a. Forest Conservation (Amendment) Act, 2023 chu hman a nih chuan kawng tam takah hmasawna rang zawk neih beiseiin Mizoram Legislative Assembly chuan Mizorama hman turin a lo pawm ta tih a sawi.

Pu C. Lalramzauva chuan ZPM sorkarin Official Resolution siama FCAA, 2023 a lo pawm tak chu MNF Party General Hqrs. chuan nasa taka dodalin, thiah leh a nih ngei theih nan Assembly Speaker hnenah ngenna an lo thelut tawh tih a sawi a. Zoram mipuite leh ram leh hnam tana pawl khawihna namen lo thlen thei FCAA, 2023 chu a nih ang ang hman a nih theih nana ZPM sorkarin Official Resolution a lo siam, ram mipui pungkhawm leh Party hrang hrang te pawhin hnuk let leh tura an ngenna bengkhawn lova tan an la khawh luih tlat avangin MNF Party Gen. Hqrs. Executive Committee Meeting tun thla ni 7-a neihah Mizoram Pum-huap Total Bandh chu hreh tak chungin huaihawt a rel a ti a, Zoram mipuite chu thlawp vek tura an sawm thu a sawi a ni.



THENZAWL PEACE CITY MASTER PLAN

Chief Minister Pu Lalduhoma’n Thenzawl Peace City chu Mizorama Plan City hmasa ber leh a awm chhun a ni dawn a ti.

He thu hi nimina Thenzawl Peace City Master Plan siam tura thlan IPE Global thuneitute a kawmna ah sawiin Pu Lalduhoma chuan Thenzawl chu Khawpui changkang leh mawi tak, khualzinte tlawh nasat khua ni khawpa duan an duh a ti a. tha tak leh chak taka thawk turin a hrilh a, a tul dan a zira State Project Monitoring Committee in an vil tur thu a hrilh bawk.

Thenzawl Peace City Master Plan siam hna thawh chungchang Pre Bid Queries rawn ngaihventu hi Company lian tak tak 18 an awm a. Tender tihchhuah a nih hnuah uluk takin a chhangtute hi endik an ni a. Ram 100 aia tama hetiang lam lo thawk tawh, ram hrang hrang pangaa office nei, India ramah pawh office hmun 20 a nei mek, India hmun hrang hranga City Master Plan lo siam tawh thin, IPE Global hi thlan an ni ta a ni.

IPE Global hi Inremna ziahpui an ni tawh a, inremna ziah atanga hapta thum chhungin Mizoramah office an rawn hawng ang a. An hna an tan nghal dawn a ni.



MZP HEADQUARTERS MANIPUR ANNUAL CONFERENCE

MZP President Dr. C. Lalremruata’n buaina hrang hrang Zofate'n an tawh thin chhan chu inlungual loh vang leh thu khat vuaa awm loh vang a ni a ti.

Wawiina MZP Headquarters Manipur in Annual Conference cum Meritorious Award Distribution Vawi 70-na Lamka Branch YMA Hall-a buatsaih a hmanpuinaah he thu hi MZP President chuan a sawi a. Dr. C. Lalremruata chuan Zohnahthlak unaute chu inhmangaiha zai khata luan ho leh a pawimawh thu a sawi a. He thu hi an hriat tam tawh tak, Mizoram atanga kal apiangin an sawi, Manipur atanga Mizorama Zofate an kal apianga an sawi thin a nih thu a sawi a. Tun thlenga a hlawhtlinna hmel hmuh tur a la awm loh chhan chu tumah an inzahtawn loh vang a nih thu sawiin thukhawmin thil tha tak tak sawiho thin ni mahse, kal darh hnuah a bawhzuina kawngah hmalak tum an awm lo thin tih a sawi a. MZP thiltuma Zohnahthlak hnam hrang hrangte inpumkhata, ram rorelna pakhat hnuaia awm tih chu a taka a thlenna tur chuan Zofa unaute remna chibai inbuka, duhsakna leh hmangaihna nena hma lak ho a pawimawh thu leh chumi tur chuan Manipura Zohnahthlak te pawh a sawm thu a sawi a ni.

Byte of MZP President

He hunah hian Mizoram atangin MZP headquarters hrang hrang hruaitute an tel bawk a ni.



REVITALISING TLAWNG RIVER

Chief Minister Pu Lalduhoma hovin nimin khan Aizawl leh Lunglei tui tlan Tlawng lui pawimawhna leh a luitui tlem zel tihpun dan tur sawiho a ni.

Planning & Programme Implementation Department Conference Hall-a Irrigation & Water Resources Department bultuma 'Stakeholder Consultation on Revitalising Tlawng River through Springshed Management & Allied Strategies' thutkhawmah hian Chief Minister Pu Lalduhoma chuan Brahmaputra Board leh IIT Roorkee-te nen Mizoram sorkar chuan thawhhona tha tak a kalpui mek thu a sawi a, Mat lui zirchianna, nungchate humhalhna, lui dunga eizawnna siam leh lui dung inkalpawhna tha siamna turin ‘Mat Valley Integrated Water Resource Management and Climate-Resilient Irrigation Project’ kalpui mek a nih thu sawiin, lui luan dan leh an dinhmun dik tak hriat theihna turin ‘State Water Informatics Centre’ pawh a taka kalpui mek a nih thu a sawi bawk.

Chief Minister chuan IWRD, Brahmaputra Board, PHED leh IIT, Roorkee tangkawp ruahmannain Tlawng lui leh a fintu lui te zawk humhalhna huang zau zawka kalpuina tur a nih angin, Tlawng lui leh a chhunga cheng nungchate humhalhna leh hmasawnna inbuktawk thlen tirna kawngah hmasawnna nasa zawk a thlen ngei a beisei thu a sawi a, Mizoram sorkar chuan hemi kawnga hmalakna chak zawka kalpui a nih theih nan ‘Mizoram (Protection of Rivers) Act, 2023’ chu a lo pawm tawh tih a sawi bawk.

